



UKA 2017/60

11. oktober 2017

Debora Kleist/Laura Taunaijik

**Immuup sukkuaniq sapingaqarnerup annertussusaanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinnermut ilanngun- neqassapput inuttaasut immuup sukkuaniq sapingallit iluaquserni- arlugit suliniutit suut aallartinneqarnissaannut innersuussutit.**

(Inatsisartunut ilaasortaq Randi V Evaldsen, Demokraatit)

Siullermik Inatsisartunut ilaasortaq Randi V Evaldsen qutsavigerusupparput siunnersuutaanut.

Siunnersuummi immuup sukkuaniq sapigaqarnerup annertussusaanik misissuisoqarnissaa, tassungalu ilanngullugu inuttaasut immuup sukkuaniq sapigallit iluaquserniarlugit suliniutit suut aallartinneqarnissaannut innersuussutinik aammattaaq misissuinnermi ilanngussisoqassasoq siunnersuutigaa.

Oqaatigissavarput siunnersuuteqartup tunngavilersuutai ersarillutillu paasinarluarmata, aammattaaq maluginiarparput oqariartuutigimmagu annerpaamik ulluinnarni nalinginnaasumik inuusoqarsinnaasoq naak immuup sukkuaniq sapigaqartuugaluarluni. Taammaatorlu immuup sukkuaniq pinngitsoorniarnissaq eqqumaffigisariaqartoq.

Ilanngullugu eqqaaneqarpoq ullumikkut inuit immuup sukkuaniq arrortitsisinnaanngitsut amerliartornerat kiisalu nioqqutissat immuup sukkuaniq akoqanngitsut akitigut unammillernarneri.

Inuit Ataqtigiit aamma Siumut isumaqarpugut innuttaasut peqqissuunissaanut pilersaaruteqarnissaq, suliniuteqartuarnissaq aammalu qaarmarsaajuarnissaq pisariaqartuaanartuusoq, nappaatit allat aamma eqqarsaatigalugit.

Uani misissuititsineq qanoq siunertaqarnersoq kiisalu qanorpiaq atorniarneqarnersoq takujuminaatsipparput.



Naalakkersuisut akissuteqarnerminni ersersippaat ullumikkut inuttaasut immummik arrortitsisinnaangitsut assigiinngitsutigut ikiorserneqarsinnaasut. Pasitsaasaqaraanilu nakorsamit misissorneqareernerup kingorna ilitsersorneqarsinnaanermut periarfissaqartoq. Siunnersorneqarsinnaanerup saniatigut quppersagaqartoq peqqik.gl iserfigalugu aaneqarsinnaasumik. Kiisalu ersarissarneqarpoq immuup sukkuunik arrortitsisinnaanginneq pillugu quppersakkat assigisaallu pisiniarfinnut siammarterneqarnissaat siunertaralugu piniarfiit suleqatiginiaraat. Qupersakkat inuit ornitagaanut soorlu atuakkanik atorniartarfinnut aammattaaq ilineqarnissaat kaammattuutigerusunnarpoq.

Peqqinnissaqarfiup ataani "Inuunerissarfiit" qanimut suleqatigalugit inuttaasut peqqissutimikkut misissorneqartarnissaat periarfissarsiuunneqarsinnaasutut isigaarput innersuusutigerusullugulu. Soorlu kvartalikkaartumik illoqarfiit katersortafiini aammalu nunaqarfiit inuttaasut illuanut ornigullutik misissortikkiartorsinnaalersillugit. Taammaasilluni inuup nammineq aamma peqqinnerulluni inuunissani akisussaaqataffigeqqullugu. Peqatigiiffiit assigiinngitsut suleqatigalugit qanoq peqqinnerulersinnaanerput suleqatigiiffiqarsinnaasutut takorloorneqarsinnaavoq.

Ilanngullugu eqqasaatersuutigineqarsinnaavoq Inuunerittap ataani aningaasanik immikkoortitsilluni pilersitsineq, qulequttanut aalangersimasunut, suliniutinullu aalajangersimasunut qinnuteqarfigineqarsinnaasoq. Soorlu sapigalinnut suliniutinut, pisuttuartartut peqatigiiffiannut, qaarmasaanernut ingerlataqartunut, kalaalimertornerulersissarput anguniarlu suleqatigiinnut.

Ilanngullugu nerisaqarnermut suinnersuisooqatigiit suliat pitsaasutut isigalugit tapersersornartipparput.

Taamatut oqaaseqarluta Naalakkersuisut taperserlugit siunnersuutigineqartup taamatut isikkoqarluni itigartinneqarnissaa innersuusutigaarput